

***INTERNACIONALNI BURČ UNIVERZITET***  
***INTERNATIONAL BURCH UNIVERSITY***



**PRAVILNIK O DISCIPLINSKOJ I MATERIJALNOJ ODGOVORNOSTI  
STUDENATA NA VISOKOŠKOLSKOJ USTANOVI INTERNACIONALNI  
BURČ UNIVERZITET – INTERNATIONAL BURCH UNIVERSITY**

**Sarajevo, 2017**

Na osnovu člana 119 i člana 84 Zakona o visokom obrazovanju Kantona Sarajevo („Službene novine Kantona Sarajevo“ br. 42/13 i 13/15), a u vezi sa članom 21 i članom 115 Statuta visokoškolske ustanove Internacionalni Burč univerzitet - International Burch University, te na osnovu utvrđenog prijedloga od strane Rektora Univerziteta, Senat je na svojoj CXXXVII sjednici, održanoj dana 29.03.2017. godine donio, a Upravni odbor Internacionalnog Burč univerziteta na sjednici održanoj 05.04.2017. godine odobrio sljedeći

**PRAVILNIK**  
**o disciplinskoj i materijalnoj odgovornosti studenata na visokoškolskoj ustanovi**  
**Internacionalni Burč univerzitet – International Burch University**  
**-Prečišćeni tekst-**

## **I OPĆE ODREDBE**

### **1. Predmet pravilnika**

#### **Član 1.**

Ovim Pravilnikom reguliše se disciplinska i materijalna odgovornost studenata na Internacionalnom Burč univerzitetu (u daljem tekstu Univerzitet), odnosno na fakultetima koji se nalaze u sastavu Univerziteta, utvrđuju se obaveze studenata, lakše i teže disciplinske povrede, disciplinske mjere i naknada štete, nadležni disciplinski organi, pokretanje i provođenje postupka utvrđivanja odgovornosti, rokovi, evidencije i druga relevantna pitanja.

#### **Član 2.**

- (1) Odgovornost, iz ovog Pravilnika, može biti:
  - a) disciplinska, usljed povrede obaveze (discipline) studenata, i
  - b) materijalna (naknada štete), kada je šteta prouzrokovana.
- (2) Odgovornost iz stava 1 ovog člana temelji se na krivici učinioca (subjektivna odgovornost).

#### **Član 3.**

Ukoliko određeno pitanje nije riješeno ovim Pravilnikom, supsidijarno se primjenjuju:

- a) opća pravila o krivičnoj i imovinskoj odgovornosti i
- b) pravila Zakona o upravnom postupku.

### **2. Pojam studenta**

#### **Član 4.**

- (1) Student Internacionalnog Burč univerziteta (u daljem tekstu: Univerzitet), u smislu ovog Pravilnika, jeste fizičko lice upisano na studije na Univerzitetu, odnosno fakultetu u sastavu Univerziteta.
- (2) Studentom iz stava 1 ovog člana smatra se i student na razmjeni i polaznik programa stalnog usavršavanja koji se ostvaruje na fakultetu, odnosno na Univerzitetu.
- (3) Status studenta dokazuje se javnom ispravom koju izdaje Univerzitet i odgovarajućim evidencijama koje vodi Studentska služba Univerziteta.

### **3. Lice koje nema status studenta**

#### **Član 5.**

- (1) Na lice koje, u smislu ovog Pravilnika, nema status studenta, a prekršilo je pravilo ili pravila vezana za studiranje koja su utvrđena zakonom, aktima Univerziteta i aktima fakulteta, primjenjuju se opća pravila o krivičnoj i imovinskoj odgovornosti koja važe u BiH.
- (2) Protiv lica iz stava 1 ovog člana Pravilnika, Rektor podnosi prijavu nadležnom državnom organu.

### **4. Obaveze studenta**

#### **Član 6.**

Student Univerziteta dužan je da se pridržava propisa utvrđenih Zakonom o visokom obrazovanju, statutom i općim aktima Univerziteta i fakulteta u sastavu Univerziteta, da čuva ugled i da poštuje prava zaposlenih i studenata na Univerzitetu i fakultetu na kome studira, da poštuje propisanu disciplinu i uobičajena pravila ponašanja u okviru univerzitetske akademske zajednice i da uredno izvršava svoje obaveze.

### **5. Odnos disciplinske povrede, krivičnog djela i prekršaja**

#### **Član 7.**

- (1) Pravosnažno utvrđena odgovornost za disciplinsku povredu koja ima obilježja krivičnog djela ili prekršaja ne isključuje mogućnost vođenja krivičnog ili prekršajnog postupka.
- (2) Disciplinski organi vezani su pravosnažnom krivičnom odlukom u pogledu postojanja krivičnog djela i krivice učinioca.
- (3) Disciplinski organi mogu prekinuti disciplinski postupak do okončanja krivičnog postupka za djelo iz stava 1 ovog člana.
- (4) Odredbe stava 2 i stava 3 ovog člana shodno se primenjuju i na odluku donesenu u prekršajnom postupku.

### **6. Naknada materijalne štete**

#### **Član 8.**

Student je dužan da naknadi materijalnu štetu koju učini fakultetu, odnosno Univerzitetu.

## **II DISCIPLINSKE POVREDE**

### **7. Pojam disciplinske povrede**

#### **Član 9.**

Disciplinska povreda je ona povreda koja je ovim Pravilnikom predviđena kao disciplinska povreda i koja predstavlja povredu odredaba o obavezama studenta.

## **8. Vrste disciplinskih povreda**

### **Član 10.**

Disciplinska povreda može biti lakša i teža.

## **9. Lakše disciplinske povrede**

### **Član 11.**

Lakše disciplinske povrede učinjene na fakultetu, odnosno Univerzitetu su:

- a) dolazak na predavanje, vježbe i druge obavezne oblike nastave sa zakašnjenjem ili neopravdanim napuštanjem prije određenog vremena;
- b) kršenje reda na predavanjima, vježbama, ispitima i drugim oblicima nastave, kao i nenastavnim skupovima (svečanostima, tribinama, okruglim stolovima, panel diskusijama i sl.) koji se organizuju u prostorijama fakulteta i Univerziteta, a koje nije predviđeno kao teža disciplinska povreda;
- c) nedolično ponašanje na Univerzitetu ili neprimjeren odnos prema studentima, nastavnicima, saradnicima i drugim zaposlenicima Univerziteta;
- d) pravljenje izgreda u toku nastave čime se ometa normalan rad nastavnika i saradnika;
- e) oštećivanje opreme, bibliotečkog knjižnog fonda i druge imovine Univerziteta;
- f) prouzrokovanje manje materijalne štete na predmetima u vlasništvu Univerziteta ili u vlasništvu drugih lica, u okviru kampusa Univerziteta;
- g) ponašanje koje može narušiti ugled Univerziteta, studenata Univerziteta, nastavnika, saradnika i drugih zaposlenika Univerziteta;
- h) dolazak na kampus Univerziteta u garderobi neprikladnoj za akademsku ustanovu;
- i) učešće u političkim okupljanjima i drugim skupovima u prostorima Univerziteta čije je održavanje zabranjeno;
- j) pisanje ili crtanje sadržaja ili postavljanje postera i banera na kampusu na mjestima koja nisu predviđena za to i bez odobrenja nadležnih tijela Univerziteta;
- k) vršenje drugih aktivnosti kojima se nanosi šteta i narušava ugled Univerziteta, nastavnika i saradnika i drugih radnika Univerziteta i studenata.

## **10. Teže disciplinske povrede**

### **Član 12.**

Teže disciplinske povrede učinjene na fakultetu, odnosno Univerzitetu su:

- a) sprečavanje ili ometanje održavanja nastave (na predavanjima, vježbama, parcijalnim ispitima, laboratorijskim vježbama, završnim ispitima i drugim oblicima nastave) i rada u toku nastave;
- b) namjerno nanošenje materijalne štete infrastrukturi, opremi i inventaru;
- c) nanošenje povrede časti ili prijetnje nastavnicima, saradnicima i drugim zaposlenima, studentima kao i drugim licima koja se nalaze u prostorijama Univerziteta ili fakulteta;
- d) dolazak studenta na nastavu, ispitate i na fakultet, odnosno Univerzitet u vidno alkoholisanom stanju ili pod dejstvom opojnih droga, uz manifestaciju agresivnog ponašanja;
- e) navođenje na upotrebu alkohola ili opojnih droga ili davanje ili pomaganje u upotrebi alkohola ili opojnih droga ili upotreba tih sredstava u prostorijama fakulteta, odnosno Univerziteta;

- f) nepoštivanje zabrane o pušenju;
- g) nepridržavanje propisa o zaštiti na radu ili namjerno ugrožavanje bezbjednosti nepridržavanjem propisa o zaštiti na radu;
- h) korištenje ili posjedovanje nedozvoljenih sredstava na parcijalnom ispitu, završnom ispitu ili drugim ispitnim ili predispitnim obavezama;
- i) varanje na ispitu (prepisivanje), odnosno polaganje ispita protivno Pravilima studiranja I, II ili III. ciklusa studija;
- j) polaganje ispitnih ili predispitnih obaveza umjesto drugog i organizovanje polaganja ispita umjesto drugog i izrada pisanih radova za drugog;
- k) prepravka i upisivanje podataka u javnu ispravu koju izdaje fakultet, odnosno Univerzitet;
- l) davanje dokumenata (indeks, studentska identifikaciona kartica) ili svojih lozinki za elektronske servise (lozinke za portal SIS, za e-poštu ili neke druge fakultetske servise) drugim studentima ili drugim fizičkim licima, osim u slučaju spriječenosti studenta da prisustvuje upisu ocjena za ispit koji je položio, ili ovjere indeksa za redovno prisustvo nastavi;
- m) prepravka ili dopisivanje podataka u evidencije koje vodi fakultet, odnosno Univerzitet;
- n) krađa imovine fakulteta, odnosno Univerziteta ili imovine zaposlenih i studenata;
- o) izazivanje tuče ili učestvovanje u tuči u prostorijama fakulteta, odnosno Univerziteta ili u dvorištu, kao i izazivanje nasilja i nedoličnog ponašanja na tim mjestima koje podrazumjeva: nasilno bacanje predmeta; unošenje obilježja kojima se vrijeđaju nacionalna, rasna, vjerska ili druga osjećanja ili na drugi način izaziva mržnja ili netrpeljivost koja može da dovede do fizičkih sukoba; neovlašteni ulazak u službene prostorije fakulteta, odnosno Univerziteta; pokušaj unošenja, kao unošenje, ili korištenje pirotehničkih sredstava i drugih predmeta i sredstava kojima može da se ugrozi bezbjednost studenata i zaposlenih na fakultetu ili Univerzitetu ili ometa tok nastave, paljenje predmeta;
- p) širenje nacionalne, vjerske, rasne i druge netrpeljivosti;
- q) političko, stranačko i vjersko organizovanje i djelovanje u prostorijama fakulteta, odnosno Univerziteta;
- r) neovlašteno umnožavanje materijala za pripremanje ispita (fotokopiranje udžbenika i sl.) radi stavljanja u promet i sticanja materijalne dobiti;
- s) neovlašteno korištenje sredstava računskog centra, laboratorija i drugih organizacionih jedinica;
- t) pomaganje i prikrivanje aktivnosti svih lica koja čine disciplinsku povredu u smislu ovog pravilnika, odnosno prekršaj;
- u) podnošenje djelimičnih ili potpunih plagijata (naročito radova prethodno ocijenjenih na istom ili drugom fakultetu ili Univerzitetu) u okviru domaćih zadataka, seminarskih ili semestralnih radova, laboratorijskih vježbi ili izvještaja, projekata ili drugih ispitnih ili predispitnih obaveza;
- v) iznošenje i pronošnje, putem sredstava javnog informisanja i na javnim skupovima, neistinitih tvrdnji kojima se nanosi šteta ugledu Univerziteta;
- w) unošenje oružja i eksplozivnih naprava na kampus Univerziteta;
- x) težom povredom smatra se tri ili više puta ponovljena lakša povreda;
- y) druge aktivnosti koje nisu navedene, a predviđene su kao kažnjive drugim propisima ili općim aktima Univerziteta i fakulteta, a koje kao težu povredu ocijeni disciplinska komisija.

## **11. Svojtvo u izvršenju povrede obaveze/discipline**

### **Član 13.**

- (1) Povredu obaveze/discipline student može učiniti u svojtvu:
  - a) izvršioca ili saizvršioca (više lica),
  - b) podstrekača,
  - c) pomagača, i
  - d) prikrivača.
- (2) Svojtvo i stepen krivice (krivnje) u izvršenju povrede obaveze utvrđuju se u disciplinskom postupku.

## **12. Mjesto izvršenja povrede obaveze/discipline**

### **Član 14.**

Povreda obaveze/discipline može biti učinjena:

- a) u bilo kojoj prostoriji u zgradi ili zgradama Univerziteta ili u neposrednoj blizini zgrade Univerziteta;
- b) u prostorijama ili ispred prostorija u kojima se izvodi nastava;
- c) na svakom drugom mjestu, ako se preduzetim radnjama narušava ugled Univerziteta, drugog studenta ili studenata, nastavnika i saradnika ili nekog iz nenastavnog osoblja Univerziteta (npr. iznošenje neistinitih informacija, podataka);
- d) na svakom drugom mjestu, ako se preduzetim radnjama namjeravalo steći neko pravo na protupravan način ili protivpravna imovinska korist (npr. falsifikovanje javne isprave koju izdaje Univerzitet).

## **III DISCIPLINSKE MJERE I NAKNADA ŠTETE**

### **13. Vrste disciplinskih mera**

#### **Član 15.**

- (1) Učiniocu lakše disciplinske povrede se mogu izreći sljedeće disciplinske mjere:
  - a) usmena opomena i
  - b) javna opomena (oglašavanje na oglasnoj tabli Univerziteta).
- (2) Učiniocu teže disciplinske povrede se mogu izreći sljedeće disciplinske mjere:
  - a) zabrana polaganja određenih predispitnih obaveza u jednom ili više termina;
  - b) zabrana polaganja određenih ispita u jednom ili više ispitnih rokova;
  - c) zabrana polaganja svih ispita u jednom ili više ispitnih rokova;
  - d) oduzimanje odnosno smanjenje stipendije/popusta na školarinu dodijeljenog od strane Univerziteta po bilo kom osnovu;
  - e) privremeno udaljavanje sa fakulteta, odnosno Univerziteta;
  - f) isključenje sa studija na fakultetu, odnosno Univerzitetu.

### **14. Privremeno udaljavanje sa fakulteta odnosno Univerziteta**

#### **Član 16.**

- (1) Privremeno udaljavanje sa fakulteta, odnosno Univerziteta ne može biti kraće od jednog

mjeseca, niti duže od dva semestra.

- (2) Za vrijeme trajanja disciplinske mjere iz stava 1 ovog člana studentu miruje status na fakultetu, odnosno Univerzitetu.

## **15. Isključenje sa studija fakulteta, odnosno Univerziteta**

### **Član 17.**

Mjera isključenja sa Univerziteta može se izreći samo za težu povredu.

## **16. Mjere propisane drugim aktima**

### **Član 18.**

- (1) Drugim općim aktima Univerziteta, odnosno njegovih organizacionih jedinica, mogu se propisati posebne mjere za određene povrede studentskih obaveza vezane za posebnu vrstu studija (npr. Pripremna škola engleskog jezika) koje se izriču u postupcima uređenim datim aktima.
- (2) Na sva pitanja koja nisu uređena datim aktima primjenjuje se ovaj Pravilnik.

## **17. Olakšavajuće i otežavajuće okolnosti**

### **Član 18.**

Prilikom izricanja disciplinske mjere uzimaju se u obzir olakšavajuće i otežavajuće okolnosti, a naročito:

- a) težina povrede i njene posljedice;
- b) stepen odgovornosti studenta;
- c) uslovi pod kojima je povreda učinjena;
- d) prethodno ponašanje studenta;
- e) ponašanje studenta u toku postupka;
- f) stav oštećenog ako se radi o takvoj vrsti povrede i sl.

## **18. Naknada štete**

### **Član 19.**

- (1) Odgovornost iz osnova prouzrokovanja štete postoji, ako je radnja učinjena namjerno ili iz krajnje nepažnje.
- (2) Naknada prouzrokovane štete obuhvata prostu (stvarnu) štetu u visini stvarnog oštećenja, uključujući i odgovarajuće troškove.

## **19. Kumulacija sankcija**

### **Član 20.**

Odlukom o izricanju disciplinske mjere određuje se i iznos naknade štete, ako je šteta prouzrokovana.

## **20. Šteta učinjena drugom licu**

### **Član 21.**

Ako je student prouzrokovao štetu na imovini ili ličnom dobru drugom licu, Univerzitet ne odgovara za štetu.

## **IV DISCIPLINSKI ORGANI**

### **21. Nadležnost**

#### **Član 22.**

- (1) Disciplinski organi koji vode disciplinski postupak su:
  - a) disciplinska komisija fakulteta kao prvostepeni organ (u daljem tekstu: prvostepena komisija);
  - b) disciplinska komisija Univerziteta kao drugostepeni organ (u daljem tekstu: drugostepena komisija).
- (2) O disciplinskoj povredi koju učini student koji je član Studentskog parlamenta Univerziteta (ako je povredu je načinio vršeci svoju funkciju) odlučuje ad hoc disciplinska komisija od tri člana koje imenuje Rektor od kojih je jedan član student koga delegira Studentski parlament Univerziteta.

### **22. Sastav**

#### **Član 23.**

- (1) Prvostepena komisija ima tri člana koje bira dekan fakulteta iz reda nastavnika.
- (2) Drugostepena komisija ima pet članova koje bira Rektor Univerziteta iz reda nastavnika Univerziteta.

## **V PRVOSTEPENI DISCIPLINSKI POSTUPAK**

### **23. Disciplinska prijava**

#### **Član 24.**

- (1) Disciplinsku prijavu može podnijeti nastavnik, saradnik, lice zaposleno na Univerzitetu, student i drugo zainteresovano lice.
- (2) U disciplinskoj prijavi se moraju naznačiti: ime i prezime studenta, vrijeme, mjesto i način izvršenja disciplinske povrede, podatke o šteti ako je nastala, dokaze i potpis podnosioca.
- (3) Prijava se podnosi u pisanom obliku, neposredno, redovnom ili elektronskom poštom. Prijava podnijeta elektronskom poštom mora biti potvrđena svojeručnim potpisom podnosioca u roku od sedam dana.

### **24. Nadležnosti dekana**

#### **Član 25.**

Disciplinska prijava se podnosi dekanu fakulteta na kome studira student za koga se sumnja da je učinio disciplinsku povredu.



## **25. Pokretanje postupka**

### **Član 26.**

- (1) Postupak za utvrđivanje odgovornosti pokreće dekan odlukom o imenovanju disciplinske komisije. Komisija iz prethodnog stava može biti imenovana i kao stalna.
- (2) Odlukom o pokretanju postupka za utvrđivanje odgovornosti obavezno sadrži podatke iz člana 24, stava 2 ovog Pravilnika.
- (3) Odluka o pokretanju postupka lično se uručuje studentu putem Protokola fakulteta odnosno, uz obavezno uputstvo da može angažovati punomoćnika.
- (4) Disciplinski postupak u smislu člana 22, stav 2 ovog Pravilnika pokreće Rektor Univerziteta.

## **26. Rokovi**

### **Član 27.**

- (1) Postupak za utvrđivanje odgovornosti studenta za učinjene povrede obaveza/discipline i prouzrokovanu štetu, ne može se pokrenuti niti voditi:
  - a) nakon isteka šest mjeseci od dana saznanja za povredu obaveze i počinioca (subjektivni rok);
  - b) nakon isteka godine dana od dana kada je povreda obaveze iz stava 1 ovog člana učinjena (objektivni rok).
- (2) Ako učinjena povreda obaveze/discipline ima obilježje krivičnog djela (npr. falsifikovanje javne isprave), apsolutni rok zastare jeste onaj rok koji je krivičnim zakonom utvrđen za to djelo.

## **27. Pravne posljedice pokretanja disciplinskog postupka**

### **Član 28.**

Student protiv koga je pokrenut disciplinski postupak (u daljem tekstu: optuženi) ne može da se ispiše sa fakulteta, odnosno Univerziteta sve do pravnosnažnog okončanja disciplinskog postupka.

## **28. Zakazivanje rasprave**

### **Član 29.**

- (1) Disciplinska komisija zakazuje raspravu za utvrđivanje odgovornosti za povredu obaveze/discipline i prouzrokovanu štetu u što kraćem roku.
- (2) Rasprava se zakazuje u prostorijama Univerziteta u toku radnog vremena.
- (3) Na raspravu se poziva student protiv koga je pokrenut postupak ili njegov punomoćnik i drugo lice čije je prisustvo neophodno.

## **29. Održavanje (tok) rasprave**

### **Član 30.**

- (1) Usmenu raspravu vodi predsjednik Disciplinske komisije.

- (2) Rasprava se ne može održati, ako student protiv koga se vodi postupak, odnosno njegov punomoćnik nije uredno obaviješten.
- (3) Usmena rasprava se odvija prema sljedećem redoslijedu:
  - a) konstatovanjem prisustva pozvanih lica i utvrđivanjem njihovog svojstva (lice protiv koga se vodi postupak, svjedok, vještak, zapisničar i dr.),
  - b) čitanjem disciplinske povrede iz člana 11, odnosno člana 12 ovog Pravilnika, a za koju se student tereti,
  - c) davanjem izjave od strane studenta protiv koga se vodi postupak,
  - d) provođenjem dokaznog postupka: uvidom u javne isprave, saslušanjem svjedoka, uvidom u odgovarajuće evidencije Univerziteta, saslušanjem vještaka i dr.,
  - e) davanjem završnih izjava studenta protiv koga se vodi postupak, i eventualno, njegovog punomoćnika.
- (4) Rasprava se odvija postavljanjem pitanja i davanjem odgovora (kontradiktornost postupka). Ako se rasprava ne može završiti na jednom ročištu, zakazuje se novo ročište, najkasnije za 15 dana.

### **30. Dostavljanje odluke**

#### **Član 31.**

- (1) Odlukom, kojom se odlučuje o disciplinskoj mjeri i naknadi štete, dekan donosi najkasnije osam (8) dana nakon zaključenja rasprave, na osnovu prijedloga Disciplinske komisije.
- (2) Odluka iz stava 1 ovog člana sadrži, naročito:
  - a) ime i prezime studenta protiv koga se izriče mjera i podaci o njegovoj identifikaciji,
  - b) opis učinjene radnje, mjesto, vrijeme i način izvršenja,
  - c) vrstu disciplinske mjere i iznos naknade štete, ako je student proglašen krivim,
  - d) obrazloženje rješenja,
  - e) pouku o pravnom lijeku i rok za podnošenje žalbe, i
  - f) potpis dekana i pečat fakulteta, sa brojem i datumom rješenja.
- (3) Ako je student oslobođen od odgovornosti ili je postupak o utvrđivanju odgovornosti obustavljen, u dispozitivu odluke se navodi izreka o tome uz sve ostale elemente iz stava 3 ovog člana.
- (4) Odluka iz stava 1 ovog člana uručuje se lično studentu putem Protokola fakulteta, ako je to moguće, u protivnom, primijenit će se odredbe Zakona o upravnom postupku.

### **31. Žalba**

#### **Član 32.**

- (1) Protiv odluke iz člana 31 ovog Pravilnika student može, lično ili putem svog punomoćnika, uložiti žalbu disciplinskoj komisiji Univerziteta, kao drugostepenom organu.
- (2) Žalba se ulaže, najkasnije osam (8) dana, računajući od dana prijema prvostepenog rješenja. Disciplinska komisija Univerziteta može prvostepeno rješenje: potvrditi ili preinačiti ili poništiti, u cijelosti ili djelimično.
- (3) Odluka disciplinske komisije Univerziteta je konačna.

## **VI DRUGOSTEPENI POSTUPAK**

### **32. Ovlašteni podnosioci žalbe**

#### **Član 33.**

Protiv odluke dekana fakulteta žalbu mogu da izjave:

- a) optuženi ili njegov punomoćnik;
- b) podnosilac disciplinske prijave.

### **33. Podnošenje žalbe**

#### **Član 34.**

- (1) Žalba se podnosi u roku od osam dana od dana prijema prvostepene odluke.
- (2) Žalba se podnosi dekanu koji je prosljeđuje drugostepenoj komisiji zajedno sa ostalim spisima predmeta u roku od sedam dana od dana prijema žalbe.

### **34. Razlozi za podnošenje žalbe**

#### **Član 35.**

Razlozi za podnošenje žalbe su:

- a) bitne povrede odredaba disciplinskog postupka;
- b) pogrešno i nepotpuno utvrđeno činjenično stanje;
- c) pogrešna primjena odredaba ovog Pravilnika.

### **35. Odlučivanje o žalbi**

#### **Član 36.**

- (1) Drugostepena komisija odlučuje o žalbi na sjednici na koju poziva optuženog ili njegovog punomoćnika.
- (2) Neopravdani izostanak optuženog ili punomoćnika ne predstavlja razlog za odlaganje sjednice.
- (3) Drugostepena komisija može prvostepenu odluku: potvrditi, preinačiti ili vratiti prvostepenoj komisiji na ponovno razmatranje.

### **36. Objavljivanje odluka**

#### **Član 37.**

- (1) Pravosnažna odluka disciplinskog organa objavljuje se na oglasnoj tabli Univerziteta i fakulteta, trideset dana od dana konačnosti u slučaju teže povrede obaveze i sedam dana u slučaju lakše povrede, upisuje se u indeks i matičnu knjigu.
- (2) Disciplinska komisija može odrediti da se odluka kojom se izriču mjere za teže disciplinske povrede objavi i na drugi način (čitanjem odluke na časovima nastave, objavljivanjem u studentskoj štampi, na skupovima studenata i sl.).
- (3) O izrečenim disciplinskim mjerama na fakultetu, odnosno Univerzitetu vodi se posebna evidencija.

### **37. Sprovođenje disciplinskih odluka**

#### **Član 38.**

O izvršenju pravosnažne odluke disciplinskih organa stara se dekan, odnosno Rektor, ukoliko se odluka odnosi na studenta koji je upisao studijski program na Univerzitetu.

### **38. Primjena pravila Zakona o upravnom postupku**

#### **Član 39.**

Na postupak utvrđivanja odgovornosti studenata primjenjuju se odredbe Zakona o upravnom postupku, ako u ovom Pravilniku nisu predviđena procesna pravila.

### **39. Evidencije**

#### **Član 40.**

- (1) O izrečenim disciplinskim mjerama i naknadi štete vodi se posebna evidencija, koju utvrđuje Rektor.
- (2) Evidenciju iz stava 1 ovog člana vodi Studentska služba Univerziteta.

## **VII PRELAZNE I ZAVRŠNE ODREDBE**

#### **Član 41.**

Postupak koji je pokrenut protiv studenta prije dana stupanja na snagu ovog Pravilnika okončan će se prema odredbama ovog Pravilnika, ako je on povoljniji za studenta.

#### **Član 42.**

Ovaj Pravilnik donosi Senat Univerziteta na prijedlog Rektora.

#### **Član 43.**

- (1) Danom primjene ovog Pravilnika prestaje da važi Pravilnik o disciplinskoj i materijalnoj odgovornosti studenata od 05.03.2009. godine.
- (2) Ovaj Pravilnik stupa na snagu osmog dana poslije dana njegovog objavljivanja na oglasnoj tabli Univerziteta.
- (3) Izmjene i dopune Pravilnika vrše se na način i po postupku predviđenom za njegovo donošenje.

Sarajevo, 05.04.2017.  
Broj: 01-90/17

**Predsjedavajući Senata**  
**Prof. dr. Damir Marjanović**

**Dostavljeno:**  
1x organizacione jedinice  
1x a/a

**Predsjedavajući Upravnog odbora**  
**Mustafa Đerahović**